
ՀԱՍԳԻՏՈՒԹՅՈՒՆ ԵՎ ԱԶԳԱԳՐՈՒԹՅՈՒՆ

ՎԱՐԴԱՎԱՌԻ ՔԱՌԱՄՆՈՐԴԱՑ (ՀԻՄՆԱԿԱՑ) ՊԱՇՏՔ

ԱԲՐԱՀԱՄՅԱՆ Հ. Ա.

Հայոց մեջ, սկսած վաղ միջնադարից, կենցաղավարել են ոչ միայն օրապահքերը (չորեքշաբթի, ուրբաթ) և Զատիկի տոնին նախորդող Քառասնորդաց պահքը, որոնց մասին վկայում են տոնացույցի առաջին և երկրորդ խմբագրությունները՝ կատարված Սահակ Պարթևի և Հովհան Մանդակունու կողմից¹, այլև Սուրբ Ծննդյան² և Վարդավառի տոներին նախորդող մեծ պահքերը: Ընդհանրական և տեղական բնույթի ժողովների կանոններում այդ պահքերի վերաբերյալ հիշատակություններ կամ մասնավոր հրահանգներ չկան:

Մատենագրական, ձեռագրական, կանոնական, վիմագրական և ազգագրական սկզբնաղբյուրները Վարդավառից առաջ ընկած մեծ պահքը հիշատակում են “Հիսնակաց” կամ “Քառասնորդաց պահք” անուններով:

Վարդավառի Մեծ պահքն սկսվում է Հոգեգալստյան կիրակիին հաջորդող երկուշաբթի օրվանից, սակայն դրա մասին տոնացույցի որևէ խմբագրությունում հրահանգ չկա³: Փոխարենն այն բազմիցս հիշատակվում է այլ աղբյուրներում: Այսպես. VIII դ. Խոսրովիկ Թարգմանիչը հիշում է երեք մեծ պահքերը՝ առաքինի անձանց կողմից՝ “այժմ եւս զերիս յիսներեակսն ... անխափան պահեն” բովանդակությամբ, որը, ըստ Վ. Հացունու, երեք հիսնակների մասին ամենավաղ հիշատակությունն է⁴: Պետք է նշել, որ սա առաջին վկայությունն է միաժամանակ երեք հիսնակների մասին: Ասվածը

¹ Վարդանյան Ռ., Հայոց տոնացույցը (4-18-րդ դարեր), Ե., 1999, էջ 613, 627-628:

² Հեղինակը “Աստվածահայտնության քառասնորդաց (Հիսնակաց) պահքը (պատմական համառոտ ակնարկ)” վերնագրով հոդված է ներկայացրել 2015 թ. նոյեմբերին Հնագիտության և ազգագրության ինստիտուտում կայացած “Հայ ժողովրդական մշակույթ. XVII” խորագրով գիտաժողովին, որի ընթացքում ներկայացված հոդվածների ժողովածուն լույս կտեսնի առաջիկայում:

³ Տե՛ս Սահակ Պարթևի խմբագրած “Կանոնք ընթերցվածոց”-ը Հովհան Մանդակունու կատարած երկրորդ (V դ.), Կոմիտաս Աղցեցու՝ երրորդ (VII դ.), Հովհան Օձնեցու՝ չորրորդ խմբագրությունները (VIII դ.), Սողոմոն Մաքինացու կազմած տոնական ճառընտիրը (VIII դ.), Ատոմ Վարագեցու խմբագրած Հռոմադիրը (X դ.), Գրիգոր Վկայասերի Տոնանամակը (XI դ.), մինչև XVIII դարը կատարված խմբագրությունները, Միմեոն Երևանցու կատարած տոնացույցի վերջին խմբագրությունը /1774 թ./ (տե՛ս Վարդանյան Ռ., նշվ. աշխ., էջ 212-213, 228-229, 274-275, 450-454):

⁴ Հացունի Վ., Ճաշեր և խնձոք Հին Հայաստանի մէջ, Վենետիկ-Ս. Ղազար, ՌՅԿԲ-1912, էջ 425-427:

կարելի է փաստել նաև հենց այդ վկայության մեջ առկա “այժմ” բնորոշմամբ, ինչը հուշում է VIII դ. առաջ այդ պահերի գոյության և միգրացե ավելի տարածված լինելու մասին, իսկ արդեն VIII դ. դրանք պահպանված են եղել միայն առավել բարեպաշտ անձանց շրջանում:

Վարդավառի Մեծ պահքի մասին վկայում են Մովսես Քերթոզահայր Սյունեցին “Պայծառակերպության ճառում”⁵ (ըստ Ռ. Վարդանյանի՝ գրված 703 թ.⁶), Կանոնագիրք հայոցը՝ X-XI և հետագա դարերի կանոններով⁷, Մատթեոս Ուռհայեցին⁸, Հայսմավուրքը⁹, Դավիթ Ալավկա Որդին¹⁰, XII դ. մի տոնապատճառ¹¹, Վարդան Այգեկցին¹², Կիրակոս Գանձակեցին¹³, Հովհաննես, Երզնկացին¹⁴, Սիմեոն Այրիվանեցին¹⁵, Գրիգոր Տաթևացին¹⁶:

Զլինելով տոնացուցային պահք՝ այն ընդհուպ XX դ. սկզբները կենցաղավարել է վանքերում, աշխարհիկ վերնախավում և ժողովրդի տարբեր շերտերում: Այդ են վկայում վիմագրերում հիշվող աշխարհիկ պատվիրատուի կողմից Վարդավառին նախընթաց Մեծ պահքին Պատարագ պատվիրելու և որոշակի անձանց հիշելու մասին հրահանգները: Այսպես, Անիի Մայր տաճարի (989-1001 թթ.)՝ Կատրանիդե թագուհու թողած շինարարական արձանագրության մեջ ասվում է. “...ՀՐԱՄԱԵԱԼ ԵՄ ԵՍ ՏԷՐ / ՍԱՐԳԻՍ ՍՊԱՍԱԻՈՐԱՅ ԵԿԵՂԵՅՈՅՍ, ՅԵՏ ԷԼԻՑ ԲԱՐԷՊԱՇՏ ԹԱԳՈՒՀՈՅՍ ԶՎԱՐԴԱՎԱՐԻՆ ՅԻՍՆԵԱԿՍՆ ՄԻՈՎ ՔԱՌԱՍՆԻԻ ԿԱՏԱՐԵԼ ԱՆԽԱՓԱՆ / ՄԻՆՉԵԻ Ի ԳԱԼՈՒՍՏՆ ՔՐԻՍՏՈՍԻ”¹⁷:

Արլդարիք Պահլավունու եկեղեցու XI դ. շինարարական արձանագրությունը հրահանգում է. “ՅԵՏ ԵԼԻՑ ԻՄՈՑ ՅԱՇԽԱՐՀԷՍ ԵՂԻ ԼՈՒԾ Ի ՎԵՐԱՅ ՍՊԱՍԱԻՈՐԱՅ ԵԿԵՂԵՅԻՈՅՍ ԶՎԱՐԴԱՎԱՐԻՆ :Խ: ՈՒՆՍՆ

⁵ Մովսես Սիւնեցի, Յադագս Վարդավառին խորհրդոյ, Մատենագիրք հայոց, հ. Դ, Է դար, Անթիլիաս-Լիբանան, 2005, էջ 429-436:

⁶ Վարդանյան Ռ., նշվ. աշխ., էջ 207-209:

⁷ Կանոնագիրք հայոց, հ. Բ, Ե., 1970, էջ 175-177, 277-279:

⁸ Մատթեոս Ուռհայեցի, Ժամանակագրութիւն, Վաղարշապատ, 1898, էջ 300:

⁹ Գիրք որ կոչի Այսմաւուրք, Կ. Պոլիս, 1730, էջ զճձգ:

¹⁰ Աբրահամյան Ա., Դավիթ Ալավկա Որդու կանոնները (Էջմիածին, Ժ տարի, 1953, մարտ, էջ 54-55):

¹¹ Մեսրոպ Մաշտոցի անվան հին ձեռագրերի գիտահետազոտական ինստիտուտ (այսուհետև՝ ՄՄ), N 1007, թ. 393բ-394բ:

¹² Հացունի Վ., նշվ. աշխ., էջ 428:

¹³ Պատմութիւն հայոց արարեալ Կիրակոսի վարդապետի Գանձակեցոյ, Թիֆլիս, 1909, էջ 196:

¹⁴ Յովհաննէս Երզնկացի, Խրատ բոլոր քրիստոնեաներուն, աշխարհաբարի վերածեց՝ Անուշավան վրդ. Դանիէլեան, Անթիլիաս, 1984, էջ 73:

¹⁵ Ղևոնդ Ալիշան, Հայապատում, Վենետիկ, 1901, էջ 569-570:

¹⁶ Գրիգոր Տաթևացի, Գիրք հարցմանց, Երուսաղէմ, 1993, էջ 649-650:

¹⁷ Դիվան հայ վիմագրության, պր. I, Անի, Ե., 1965, էջ 35:

ԱՆԽԱՓԱՆ ԿԱՏԱՐԵԼ ՄԻՆՉԵՒ ԳԱԼՈՒՍՏՆ ՔՐԻՍՏՈՍԻ ԸՆԴ ՆՄԻՆ ԵՒ Ձ... [ՈՐ]ԴԻՈ ԳԱԳԿԱ ՍՄՊԱՏԱ ՇԱՀԱՆՇԱՀԻ՝¹⁸:

Վարդավառի Մեծ պահքը հիշվում է նաև Հաղպատավանքի Ս. Նշան եկեղեցու՝ 1063 թ. նվիրատվական արձանագրության մեջ. «ԵՒ ԿԻՒՐԿԷԻ ԱՐԵՒՇԱՏՈՒԹԵԱՆ ԵՒ ԳՐԵՑԻՆ ԻՆՁ ԶՎԱՐԴԱՎԱՐԻՆ ՔԱՌԱՍՈՒՆՔՆ ՄԻՆՉԵՒ Ի ՎԱՆՃԱՆ ԱՇԽԱՐՀԻ՝¹⁹:

Ուշագրավ է Անիի՝ Գրիգոր Պահլավունու եկեղեցու արձանագրությունը (X դ.), որը թույլ է տալիս ենթադրել, որ ոչ բոլոր վանքերում են հետևել երեք հիսնակներին. «ԿԱՄԱՔՆ ԱՅ. ԵՍ ՎԱՀՐԱՄ ԻՇԽԱՆԱՅ ԻՇԽԱՆ, ԵՏՈՒ ԶԻՄ ՈՐԴՈՅՆ ԶԱՊՈՒԽԱՄՐԻ ՈԳԵԲԱԺԻՆ ԵՒ ԳՆԵՅԻ :Բ: ԿՈՒՂՊԱԿ ԶԼՈՐԱԳՈՅՆԻՆ ԵՒ ԶՈՐՍԱԻՏԻՆ, ՅՈՇԱԿԱՆԱՅ. ԵՏՈՒ Ի ՍՈՒՐԲ ԳՐԻԳՈՐԻ ԵՒ ՔԱՆ ԵԿԵՂԵՅԻՔՍ ՈՐ ՈՒՆԻՆ ՏԱՐԻՆ :Գ: ՔԱՌԱՍՈՒՆՔ...»²⁰:

Նույնն է փաստում նաև Սյունիքի Քարկուփ վանքի Ս. Աստվածածին եկեղեցու X դարասկզբի արձանագրությունը²¹: Այս Մեծ պահքի կամավորության մասին է վկայում Եպիփանին վերագրվող, սակայն X-XI դդ. թվագրվող կանոնում²². «Եւս առաւել ի վերայ այնոցիկ եկեցեն զշնորհքն Աստուծոյ որ զերեք յիսունսն պահեցեն յանուն Սուրբ Երրորդութեանն՝ զԶատիկն եւ զՎարդավառն եւ զՅայտնութեանն եւ ի փրկութեան Տեառն առցեն զաւետիսն»²³: Կամավորության մասին է խոսում նաև այդ հիսնակները խախտելիս պատիժներ կրելու վերաբերյալ սահմանումների բացակայությունը:

Երեք մեծ պահքերի կանոնականացված չլինելու մասին է փաստում նաև այն հանգամանքը, որ դրանք հրահանգվել են ապաշխարողներին կամ տոնացուցային պահքի օրեր խախտած անձանց՝ որպէս հատուցում: Բարսեղի կանոններում բազում մեղքերի մեջ ընկածին, մի շարք այլ հրահանգների հետ միասին, թելադրվում է երեք Քառասնորդները պահել²⁴:

¹⁸ Նույն տեղում, էջ 45:

¹⁹ Նույն տեղում, պր. IX, Լոռու մարզ, Ե., 2012, էջ 137:

²⁰ Նույն տեղում, պր. I, էջ 32:

²¹ Նույն տեղում, պր. III, Վայոց ձոր. Եղեգնաձորի և Ագիգբեկովի շրջաններ, Ե., 1967, 206 էջին հաջորդող ներդիր:

²² Վարդանյան Ռ., նշվ. աշխ., էջ 632:

²³ Կանոնագիրք հայոց, հ. Բ, էջ 277-279:

²⁴ «Որք ի բազում ծովացեալ մեղացն խորս ընկղմեցան ոչ կարելով հասանել ի նաւահանգիստն խաղաղութեան ի ձեռն ազգի ազգի առաքինութեան եւ ապաշխարութեան, յետոյ երկիւղիւ մահու ըմբռնեալ եւ ի կենդանութեանն ի կենդանի պատարագն եւս ապաւինեցան հասանելով ճշմարիտ թողութեան, արժանի է, բայց կատարեցէ զնա ճշմարիտ հաւատով եւ սիրով եւ յուսով: ... եւ զԳ Քառասնորդսն՝ զտէրունականն եւ

Հովհաննես Երզնկացին (XIII դ.) նույնպես հորդորում է, որ օրապահքերը, շաբաթապահքերը և այլ պահքերը լուծողները, որպես ապաշխարություն, երկու Քառասնորդացները (Սուրբ Ծննդյան և Վարդավառի) պահեն²⁵։ Ըստ այդմ՝ Հացունին իրավամբ եզրակացնում է, որ եթե պահեցողության այս ձևը պատիժ էր²⁶։ Այդ ժամանակաշրջանը նկարագրելով՝ Կիրակոս Գանձակեցին, խոսելով Հովհաննես վարդապետի գործունեության մասին, նշում է. «...դեռ ցայն ժամանակն ի տեղիս տեղիս լուծանէին զշաբաթ և զկիրակէ սուրբ քառասնորդաց աղուհացիցն»։ Ապա հավելում է. «...Եւ այսպէս հաստատութիւն կալաւ յամենայն տեղիս՝ զյիսներեակն պահօք վճարել, զոր առաջին կէսք պահէին և կէսք ո՛չ»²⁷։

Գրիգոր Տաթևացին հիշում է, որ աշխարհիկ դասը միայն Աղուհացից պահքն էր պահում. «Կարգաւորք երեք քառասունք պահեն, այլ աշխարհականք՝ միայն զաղուհացիցն պահեն»²⁸։

Գանձակեցու և Տաթևացու վկայությունները փաստում են այդ հիսներեակների կամայական լինելու մասին։

Ըստ ամենայնի՝ վանական միջավայրում ևս XV դ. երեք մեծ պահքերը կամայական են եղել, քանի որ Սիմեոն Այրիվանեցին (XV դ.), գնալով Ձագավանք, փորձում է վերահաստատել «գամենայն բարի կարգս և օրէնս» և միայնակյացներին ու ապաշխարողներին հրամայում է «զերեք յիսնակսն կենայ պահօք շաբաթ եւ կիրակին, զղջացեալքն միայնակեացքն և ճգնաւորքն՝ բոլոր կենան զյիսնակաց պահսն»²⁹։

Ազգագրական աղբյուրները փաստում են, որ մինչև XIX դ. կեսերը և XX դ. սկզբները ժողովրդի մեջ տարածված է եղել Հովհաննես Կարապետի կամ Օխտն անվան պասը, որը պահել են Համբարձումից կամ Հոգեգալստից մինչև Վարդավառ, երբեմն յոթ տարի շարունակ։ Վարդավառի հիսնակը կամ Ս. Կարապետի պասը պարտադիր չի եղել, այլ համարվել է կամավոր պաս։ Ուսումնասիրելով այս պասի վերաբերյալ ազգագրական և գեղարվեստական գրականության մեջ սփռված նյութերը՝ կարելի է եզրակացնել, որ այն կարծես եղել է ուխտի պաս, քանի որ պահել են որոշակի նպատակի համար և յոթ տարին լրանալուց հետո ուխտի են

գառաքելականն եւ զմարգարէականն սուրբ պահեսցէ եւ տուրնջեան եւ զհշերոյն աղաւթից զԲրաժանեալ կանոնն անխափան կատարեսցէ» (**Կանոնագիրք հայոց**, հ. Բ, էջ 175-177)։

²⁵ «Եթէ մեկը չորեքշաբթին և ուրբաթը, շաբաթապահքը եւ կամ այլ պահք լուծէ ձուկով կամ զինիով, երեք տարի թող ապաշխարէ, երկու քառասնապահքերը եւ տարւոյն բոլոր երկուշաբթիները սրբութեամբ պահք բռնէ եւ օրական հարիւր հիսուն անգամ ծնրադրէ» (**Յովհաննէս Երզնկացի**, նշվ. աշխ., էջ 73)։

²⁶ Հացունի Վ., նշվ. աշխ., էջ 429։

²⁷ Պատմություն հայոց արարեալ Կիրակոսի վարդապետի Գանձակեցույ, էջ 196։

²⁸ Գրիգոր Տաթևացի, Ձմեռան հատոր, Երուսաղէմ, 1998, էջ 148։

²⁹ Ղևոնդ Ալիշան, Հայապատում, Վենետիկ, 1901, էջ 569-570։

գնացել Մշո Գլակա վանք՝ Հովհաննես Մկրտչի մատուռ-գերեզմանին³⁰: XX դ. սկզբի պատմական հայտնի անցքերից հետո այն մոռացվել է³¹:

Վերոգրյալից ակնհայտ է դառնում, որ Զատկի, Ծննդյան և Վարդավառի Մեծ պահքերը թե՛ աշխարհիկ, թե՛ վանական միջավայրերում կենցաղավարել են անձի կամ տվյալ վանքի ներքին որոշման համաձայն: Դրանք պարտադիր են եղել ապաշխարողների համար: Հիսնակի ընթացքը գատկական Մեծ պահքի օրինակով նույնն է եղել³²: IX դ. 40-ականին Հոգեգալստից հետո ընկած չորրորդ կիրակիին նախորդող շաբաթ օրը սահմանված “Գիւտ նշխարաց սրբոյն Գրիգորի Լուսավորչին” հիշատակի օրվան նախընթաց պահքն ստացել է Լուսավորչի անունը: Ուշ շրջանում այն անվանվել է նաև “միջինք ամառան Յիսնակացն”³³, “Այս եղել ի պահն սուրբ Գրիգորի, որ ի միջինք ամառան աղուհացից”³⁴:

Մատթեոս Ուռհայեցին, Գրիգոր Բ Վկայասեր կաթողիկոսի մահվան ժամանակը նշելու համար Վարդավառի պահքը հիշելով (խոսքը 1105-1106 թթ. մասին է), գրում է. “Եւ եղել ի Տրէ ամիս, յառաջին շաբաթն ամռան աղուհացիցն, յաւուր շաբաթու վախճանեցաւ սուրբ Հայրապետն Տէր Գրիգորէս, և թաղեցաւ մեծաւ հանդիսի ի Կարմիր վանքն մերձ ի Քեսուն”³⁵:

Ստեփանոս Գոյներ Երիցանցն իր ինքնագիր տոնացույցում (XIV դ.) Հոգեգալստյան կիրակին անվանում է “Բարեկենդան ամառան աղուհացից”³⁶: Միջինքի և աղուհացի առկայությունը նույնպես խոսում են պահքի զուսպ ընթացքի մասին:

ՄՄ 1007 թվակիր XII դ. Տոնապատճառ ժողովածուի (որն, ըստ Ռ. Վարդանյանի, Սամուել Կամրջաձորեցու ժողովածուի ընդօրինակություն է³⁷) “Յաղագս տապանակին խորհուրդ” ճառի վերջնամասում “Զի՛նչ է այս. Գ. նաւակատիքս զի ոչ գոյ մսակերութիւն ի մէջ քրիստոնէից” հարցման

³⁰ Մխիթարեանց Աղ., Փշրանք Շիրակի ամբարներից, Էմինեան ազգագրական ժողովածու (այսուհետև՝ ԷԱԺ), հ. Ա, Մոսկուա-Ալեքսանդրապոլ, 1901, էջ 272: Լալայեան Ե., Նոր Բայազետի գավառ, Ազգագրական հանդես (այսուհետև՝ ԱՀ), գիրք XVII, Թիֆլիս, 1908, էջ 124: Ալաօյաճեան Ա., Պատմություն հայ Կեսարիոյ. Տեղագրական, պատմական, ազգագրական ուսումնասիրություն, հ. Բ, Գահիրէ, 1937, էջ 1748:

³¹ Ներսէս Ալիկյանը ևս այդպես է կարծում (տե՛ս Ալիկյան Լ., Քննություն Ս. Սահակի վերագրուած կանոններու եւ Հայոց եկեղեցական տարին Է դարու սկիզբը, հ. Ա, Վիեննա, 1950, էջ 134-135):

³² Այդ մասին տե՛ս նաև Հացունի Վ., նշվ. աշխ., էջ 428:

³³ Վարդանյան Ռ., նշվ. աշխ., էջ 631:

³⁴ Մատթեոս Ուռհայեցի, նշվ. աշխ., էջ 427:

³⁵ Նույն տեղում, էջ 300:

³⁶ Բաբգին ծ. վարդ. Կիլիկեբեան, Ժողովուրդին տօնացոյցը, Կ. Պոլիս, 1901, էջ 59:

³⁷ Վարդանյան Ռ., նշվ. աշխ., էջ 219-220:

պատասխանը բացահայտում է երեք հիսնականների ընթացքը, որոնց ժամանակ հրահանգվում է անգամ մատաղի միս չուտել³⁸:

Ուշագրավ է, որ Վարդավառի Մեծ պահքը տոնացույցում բացակայում է, սակայն տոնապատճառներում կա վերջինիս մեկնությունը: Դավիթ Ալավկա Որդին իր “Կանոնական օրինադրություն” աշխատության Դ կանոնում նույնպես խոսում է երեք հիսնականների ընթացքի մասին, ինչը գրեթե նույնական է վերը նշված տոնապատճառի հրահանգներին³⁹: Մակայն նա նաև արգելում է ուտել միս ու գինի՝ խրախուսելով դրանք անցկացնել “ծոմաջան պահիւք”⁴⁰:

Վարդան Այգեկցին, վկայակոչելով Հովհաննես Տավուշեցուն, “զերիս յիսնական անհաց և անջուր կատարեր”, այսինքն՝ ծոմ պահելու հրահանգ է տալիս⁴¹: Ժուժկալության այս ձևը, ըստ Հացունու, կամավոր էր և անհատական⁴²: Այս պատի ընթացքում շաբաթ և կիրակի օրերին կերել են ուտիսի կերակուրներ, բայց ոչ մսեղեն: Մաստակ չեն ծամել՝ մեղք համարելով⁴³:

Ինչպես Սուրբ Ծննդյանը նախորդող մեծ պասը, Վարդավառինը նույնպես կատարել է տնտեսական աշխատանքների ժամանակափուլերի բաժանման դեր: Այդ մասին են վկայում պահքի շաբաթներին տրված անունները: Օրինակ՝ Հոգեգալստին հաջորդող Եղիական պասը, որի ժամանակ խոտ են հնձում, կոչվել է Խոտհնձի պաս: Խոտհնձի կամ Խոտքըղի պաս է կոչվել Վարդավառի Մեծ պահքի չորրորդ շաբաթվա՝

³⁸ “Հարցումն. Զի նչ է այս. Գ. նաւակատիքս... Պատասխանի. Նաւակատիք բարձրագոյն տեսանի եւ աստուածատեսակագոյն քան զամենայն տաւնա: ...Գ տաւնս զոր տաւնէ եկեղեցի. նախ մաքրութեան կարաւտանա Օ արքք աղաթիցն: Եւ ծոմաջանութեան որոշմամբ եւ զատութեամբ յամուսնական անկողնոց: ...Արդ են ոմանք ի տգետ քահանայից հրաման տալ ի մատաղամիսք կերակրիլ որոշէ հաճոյ իմաստնոց, զի մի է մատաղամիս եւ այլ միս: ...Արդ, մի որ կերիցէ հաւասար յամենայն մսո: Ապա թէ հիւանդ է անկար թողացուց անեն պատուիրանքն: Այլ առողջ մարմնով եւ կատարեալ հասակաւ յայս. Գ. Խ ունս բնաւ միս մի՛ որ կերիցէ՝ Զատկին, Վարդավառին, եւ Յայտնութեան զի քառասունք արինակ կենացն Ադամա ունի որ ի դրախտին...” (տե՛ս ՄՄ, N 1007, թ. 393բ-394բ):

³⁹ Աբրահամյան Ա., Դավիթ Ալավկա Որդու կանոնները (Էջմիածին, Ժ տարի, 1953, մարտ, էջ 54-55): Այն աննշան խմբագրումներով համընկնում է վերոնշյալ տոնապատճառի տվյալ հատվածին (նույն տեղում: Հմմտ. ՄՄ, N 1007, թ. 393բ-394բ): Դավիթ Ալավկա Որդին իր կանոններում օգտվել է ոչ միայն եկեղեցական ժողովների և հայրերի կանոններից և ավանդություններից [տե՛ս Կոստանեանց Կ., Դավիթ վարդապետ Ալավկայ Որդի (ԱՀ, տասներորդ տարի, գիրք 15, Թիֆլիս, 1917, էջ 62)]:

⁴⁰ Աբրահամյան Ա., նշվ. աշխ., էջ 54-55:

⁴¹ Հացունի Վ., նշվ. աշխ., էջ 428:

⁴² Նույն տեղում:

⁴³ Լալաեան Ե., նշվ. աշխ., էջ 124:

Լուսավորչի գյուտ նշխարաց տոնին նախորդող հնգօրյա պասը⁴⁴. “Էքսի օրը երկուշաբթի, Խոտհնձի պասն ա”⁴⁵, “Դեռ Խոտհնձի պասն էսօր ենք մտել”⁴⁶. Այն հայտնի է նաև Խոտքրդոց անվամբ և տևում է հունիսի 15-ից մինչև հուլիսի 15-ը, երբ գյուղացիք խոտ են քաղում⁴⁷: Կարծում ենք՝ Խոտհնձի պահք բնորոշումը Վարդավառի Մեծ պահքի տարբեր շաբաթներին համընկնելը պայմանավորված է Վարդավառի, հետևաբար՝ տոնին նախորդող Մեծ պահքի շաբաթականությամբ:

Վարդավառի Մեծ պահքը չի կանոնականացվել, սակայն X-ից մինչև XI դ. կեսերին այն տոնացույցում տեսնում ենք ընդմիջարկված շաբաթապահքերով՝ մեկ շաբաթ պահք, երկու շաբաթ ուտիք հաջորդականությամբ: Այսպես, առաջին շաբաթը Հոգեգալստին հաջորդող հնգօրյա պահքն է, որը հայտնի է նաև “Եղիական պահք” անվամբ (քանի որ այդ պահքին հաջորդող շաբաթ օրը Եղիա մարգարեի տոնն է):

Հոգեգալստից հետո եկող պահքի մասին հնագույն “Կանոնք ընթերցուածոց”-ներում որևէ հիշատակություն չկա: Ռ. Վարդանյանը, հիմնվելով Սամուել Կամրջաձորեցու “Տաւնապատճառի”, Մատթեոս Ուռ-հայեցու “Ժամանակագրության” տվյալների վրա, եզրակացնում է, որ Հոգեգալստից հետո եկող հնգօրյա պահքը, որն ստացել է Եղիա մարգարեի անունը, կիրառության մեջ եղել է X դ. վերջերին և XI դ. սկզբներին, ինչը հավանական է դարձնում դրա սկզբնավորվելը VIII դ. 20-ական թթ. կամ IX դ. չորրորդ քառորդից, այլ խոսքով՝ Հովհան Օձնեցու տոնացույցի առաջին կամ երկրորդ խմբագրությունների ժամանակ: Ներսես Շնորհալիին Հոգեգալստյան կարգը փոխել է՝ մեկօրյայից վերածելով ութօրյայի, սակայն պահքի հինգ օրերը մնացել են անխախտ: Հետագայում Սիմեոն Երևանցին այդ կարգը պահպանել է⁴⁸:

⁴⁴ Մխիթարեանց Աղ., նշվ. աշխ., էջ 260, 278: Գաբրիկեան Կ., Բաղգիրք սեբաստահայ գաւառալեզուի, Երուսաղէմ, 1952, էջ 258: Մալխասյան Ստ., Հայերէն բացատրական բառարան, Ե., 1944, էջ 288:

⁴⁵ Պողոսյան Պ., Սոս և Վարդիթեր, Երկերի ժողովածու, հատոր առաջին, Ե., 1962, էջ 170:

⁴⁶ Ամատունի Ս., Հայոց բառ ու բան, Վաղարշապատ, 1912, էջ 289:

⁴⁷ Գաբրիկեան Կ., նշվ. աշխ., էջ 258:

⁴⁸ Նույն տեղում, էջ 628-30: Բաբգէն ծ. վարդ. Կիւլէսէրեան, նշվ. աշխ., էջ 58:

Առաջին դարում այլազգի քրիստոնյաները ևս Հոգեգալուստը մի օր էին տոնախմբում, իսկ հաջորդ օրերը պահք էին պահում: Այս մասին վկայում է մեծն Լևոնը Պենտեկոստեի ճառում: 567 թ. Տուրովի ժողովի 67-րդ կանոնն ասում է. “գ. թե զկնի յիսներեկին բոլոր շաբաթն խստիվ պահեսցի”: Իսիդորոս Հիսպալեցին ասում է (գիրք ա, գլ. ԿԵ) “...զկնի Պենտեկոստէին պահել ի կատարումն Բանին Քրիստոսի, թէ յորժամ բարձցի ի նոցանէ փեսայն, ապա պահեսցեն”: Լատինացիների մոտ VIII դարի նման հիշատակություն կա. Պենտեկոստեն ութ օր կատարել, իսկ հույները մինչև այսօր ութօրեք չեն կատարում (տե՛ս Աւետիքեան Գ., Բացատրութիւն շարականաց, Վենետիկ, ի վանս սրբոյն Ղազարու, 1814, էջ 570):

Չորրորդ կիրակին Գրիգոր Լուսավորչի Գյուտ նշխարաց տոնին նախորդող հնգօրյա՝ երկուշաբթիից ուրբաթ ընկած պահքն է, որը սահմանվել է IX դ. չորրորդ քառորդին: Միմեոն Երևանցին այս կանոնը ևս պահպանել է⁴⁹:

Վերջին՝ յոթերորդը Վարդավառի շաբաթապահքն է, որի մասին առաջին հիշատակությունները վերագրվում են X-XI դդ.: Ժամանակաշրջանի մատենագիր Մամուել Կամրջաձորեցին, որը մասնակցել է Հայսմավուրք և Տոնապատճառ ժողովածուների կազմելու և խմբագրելու աշխատանքներին, տեղեկացրել է այդ պահքի մասին⁵⁰:

Ռ. Վարդանյանը կասկածից վեր է համարում այն, որ Վարդավառի շաբաթապահքը տոնացույց է մտել X դ. վերջին, ինչը նշանակում է, որ այն եղել է ավելի վաղ, ըստ ամենայնի, թերևս, Հովհան Օձնեցու տոնացույցի երկրորդ IX դ. չորրորդ քառորդում կատարված խմբագրության ժամանակ⁵¹:

Այսպիսով, տեսնում ենք, որ Հոգեգալստից մինչև Վարդավառ յոթ շաբաթներից առաջինը պահք է, որն ստացել է Եղիա մարգարեի անունը, ապա երկու շաբաթ ուտիք, չորրորդը Գյուտ նշխարաց տոնին նախորդող պահքն է, որին ևս երկու շաբաթ ուտիք է հաջորդում, և յոթերորդը Վարդավառի շաբաթապահքն է:

Թերևս այս երկարամյա շրջանի պատճառով յոթ շաբաթներն ամբողջությամբ պահքի չեն վերածվել:

Վերոգրյալը կարող է հաստատել նաև Հարության, Աստվածահայտնության և Վարդավառի հիսնակների մասին Գրիգոր Տաթևացու հետևյալ հաղորդումը. «...Զի Կ օր ուրբաթ եւ չորեքշաբթի, եւ Գ քառասունք պահք է ի բոլոր տարին: Այս առաքելադիր է: Իսկ հայրապետքն բաժանեցին զերկու քառասունսն ի շաբաթապահս: ... Եւ Գ ամիսք աղուհացք է եւ յիսունք»⁵²:

Ենթադրելի է, որ ինչպես Սուրբ Ծննդյան, այնպես էլ Վարդավառի հիսնօրյա պահքն ամբողջությամբ տոնացույցում չընդգրկվելը հիմնականում պայմանավորված էր տարին երեք հիսնակներով չձանրաբեռնելու հանգամանքով: Այսպես. պահքի ընթացքում, ըստ եկեղեցական կարգի, հոգևոր գսպվածության հետ միաժամանակ պետք է զերծ մնալ նաև որոշակի սննդամթերքներից, ոգելից ըմպելիքներից, ինչպես նաև կենցաղավարման որոշ նորմերից: Հաջորդ կարևոր հանգամանքն այն է, որ հավատացյալները հիսնակների ընթացքում պետք է զրկվեին հաղորդությունից, իսկ այս խորհուրդը կարևոր է թե՛ հավատացյալի ներանձնական հոգևոր կյանքի,

⁴⁹ Վարդանյան Ռ., նշվ. աշխ., էջ 630-31:

⁵⁰ Նշվ. աշխ., էջ 632:

⁵¹ Վարդանյան Ռ., նշվ. աշխ., էջ 450, 633:

⁵² Գրիգոր Տաթևացի, Գիրք հարցմանց, էջ 649-650:

թե՛ հավատացյալ-եկեղեցի փոխհարաբերության տեսանկյունից: Այսպիսով, մի քանի երկարատև պահքերը կարող էին պատճառ դառնալ պահքից հրաժարվելուն կամ հաճախ խախտելուն, քանի որ աշխարհական մարդու համար բարդ է տևական ժամանակ հրաժարվել աշխարհիկ սովորույթներից: Դա կարող էր նաև եկեղեցուց հեռանալու պատճառ դառնալ: Հետևաբար՝ տոնացույցում չէր կարող ամրագրվել պահք, որը գործնականում կյանքի չէր կոչվելու: Ուստի՝ հիսնակաց պահքի շրջանը շաբաթապահքերի բաժանելը հարցի լուծման լավագույն միջոց էր:

Ամփոփելով վերոգրյալը՝ կարող ենք եզրակացնել, որ Վարդավառի Մեծ պահքը կենցաղավարել է միջնադարից, սակայն մնացել է ոչ կանոնական հարթության վրա:

Վիմական արձանագրությունները հուշում են, որ վանական միջավայրում Վարդավառի Մեծ պահքի գոյությունը պայմանավորված է եղել վանքի ներքին որոշմամբ: Կանոնագիրքը թույլ է տալիս եզրակացնել, որ աշխարհականների շրջանում այն հրահանգվել է ապաշխարողներին, ինչպես նաև կանոնական պահքերը խախտածներին: Մատենագրական աղբյուրները փաստում են, որ Վարդավառի հիսնակի մասին ամենավաղ հիշատակությունը թվագրվում է VIII դարով, թեև այն կարող է լինել ավելի վաղ: Վարդավառի հիսնակը X դ. վերջերին բաժանվել է շաբաթապահքերի՝ մեկ շաբաթ պահք, երկու շաբաթ ուտիք հաջորդական սկզբունքով: Ձեռագրական և մատենագրական սկզբնաղբյուրների վկայությամբ՝ այդ պահքը զատկական Աղուհացի օրինակով ունեցել է նույն ընթացքը՝ սննդային և կենցաղավարման բոլոր պահանջներով: Ըստ ամենայնի՝ Վարդավառի հիսնակը չի կանոնականացվել՝ հավատացյալի հոգևոր և աշխարհիկ կյանքը պահքի սահմանափակումներով չծանրաբեռնելու, հետևաբար՝ պահքերը խախտելու գայթակղության մեջ չզցնելու նպատակով: Վարդավառի հիսնակի կենցաղավարումը զատկականի նման լայն տարածում չի ունեցել, սակայն ամբողջովին չի վերացել: Այն պահպանվել է մինչև XX դ. սկզբները՝ որպես Սուրբ Հովհաննեսի կամ Օխտն անվան պաս:

**СОРОКАДНЕВНЫЙ (ПЯТИДЕСЯТИДНЕВНЫЙ)
ПОСТ ПРЕОБРАЖЕНИЯ****АБРААМЯН А. А.****Резюме**

Рукописные, летописные, канонические, эпиграфические и этнографические источники свидетельствуют о том, что начиная с раннего средневековья и до начала XX века армяне соблюдали пятидесятидневный пост Вардава. Он не был внесен ни в одну редакцию Святцев (Церковный календарь), поскольку сложно было в течение одного года соблюсти три длительных поста (Пятидесятидневный Пост Преображения, Пятидесятидневный Пост Рождества, Великий пост). В монастырях соблюдение поста было обусловлено внутренним уставом. В мирской среде пост был обязательным для причащавшихся и тех, кто нарушал канонические посты. Пятидесятидневный пост Вардава в середине X века был разделен на недельные посты: первая, четвертая и седьмая недели были постными, а интервалы между ними были Скоромными.

THE FORTY DAYS (FIFTY DAYS) FASTING OF TRANSFIGURATION**H. ABRAHAMYAN****Abstract**

Manuscript heritages, epigraphical, canonical, lithographical, ethnographic sources and (dated from the Early Middle Ages to the beginning of the 20th century) are testified, that among Armenian coexisted Vardavar freewill lent. It was never augmented in any version of The Armenian Apostolic Church calendar in order not to overload the year by three fifty days lents (The *Hisnakats* fast of Transfiguration, The *Hisnakats* fasting of Christmas, Lent). In monasteries it was existed by internal decision. Among laics it was kept by repentants and people, who broke the canonical fastings. At the end of the 10th century The Hisnakats fasting of Vardavar was divided into three parts as one week fasting and two weeks Meat-day by sequential basis.